

Aso – i bi gär nöd de Typ wo gern wartet. I has gern, wenn ales wie n am Schnüerli lauft, wenn ales chlappet wie n is planet ha. Da isch an sich jo nöd eso schlimm. Blos chom i öppe is Gumpe, wenn denn näbis Öberraschends dezwüschechont. Denn wert's plötzlech echli andersch. S'get e Ghetz, i mues ales omschtele ond mengmol chomi denn au z'schpot mit Öppis oder z'schpot näbe n ane. Da schtört mi wil i au nöd de Typ bi wo gern warte loot. Drom ha n i möse lerne, gnueg Ziiit iiplane för Sache wo nöd of's erscht Mol grotet – wie öppe n e sättigi 90 sekundigi Biiträg zom Neue Tag. Ziiit iiplane för Zwüschefall. Ziiit iiplane au zom Pause mache oder zom echli schnädere mit de Nochberi oder zom efach vorosse z'höckle. Mengmol glingts ond mengmol ebe no fascht oder gär nöd. Denn renn i halt ome wie n e gschtörts Huen ond versuech gliich no ales onder en Huet z'bringe. I gang de andere ond vor alem mer of 'Nerve. Ond s'get trotz alem oder weg alem Ghetz au no Leerlauf.

Meischtens gohts denn gliich no irgendwie. Ond s'tuet mer mengmol au guet wenn i merk, dass öppe n nöppis au emol tarf ondergo, wil's weniger wichtig isch als i amel määne.